

Elo zu där Proposition de loi vum Här Bourg, déi hei virläit.

Méng Fraktioun huet schon iwwer dee Problem geschwat beim Gesetz iwwer de Bail à loyer. Wéi mer dat Gesetz modifiéiert hun, hu mer drop opmiirksam gemaach, dass eng Kontradiktioun besteet tëschent dem Gesetz vum 1979 iwwer d'Aide au logement an dem Gesetz iwwer de Bail à loyer, an dat haaptsächlech bei dene Wunnéngen, déi virun 1944 gebaut gi sin, well do fir de Privatmann de Loyer plafonnéiert as op Maximum 1.500 Frang pro Zëmmer, an dat och fir d'Gemengen.

Dass dat géng zu engem Engpass féieren, dovir hu mir déi Zäit scho gewarnt. Ech mengen, dass dat Gesetz iwwer de Bail à loyer wiirkelech nët ganz vill bruecht huet, well besonnesch bei eleren Haiser, déi nach haut zu engem abordable Loyer ze verloune wieren, do as de Mietpräis esou niddreg, dass ee vum Propriétaire kaum ka verlaangen, e soll et verlounen.

Ech wunnen an engem Haus, dat virun 1944 gebaut gin as. Do si keng « transformations substantielles » dra gemaach gin an dee maximale Loyer, deen ech kënnt froë fir dat Haus, dat wieren 12.000 Frang de Mount.

Den Här Margue kuckt, well dee wunnt an engem Haus, wat jhust déi selwecht Dispositiounen huet. Den Här Margue kréich also och 12.000 Frang Loyer mëtten an der Stad fir en Haus. Ech mengen, dat sin och Tauxën, déi fir Privatleit nët realistesch sin.

Hei geet et awer elo ëm de soziale Wunnéngsbau. Déi Richtung, déi den Här Bourg indiquéiert huet, schéngt mer déi richteg Richtung ze sin, well et muss een all Abüen évitéieren. An hei si manifestement Abüen, dass Leit, doduerch dass se eng Sozialwunnéng hun, sech Suë kënnen op d'Säit setzen. Gott sei Dank brénge se dat fäerdeg, Gott sei Dank si se an enger besserer sozialer Lag, wéi se nach am Ufank woren, wéi se déi Wunnéng attribuëiert kruten! Si schafe sech en Egenheem un, verlounen dat fir deier Suen, a sëtze fir en Apel an e Stéck Brout an enger Gemengewunnéng. Dat kann nët sin!

Wouer as awer och, wann een dene Leit seet, si missten um Privatismarché eppes sichen, well de Loyer dann esou héich gët, hu se Schwiregketen um Privatismarché, well mer nach ëmmer eng Pénurie vu Logementen hun, an dee Problem gët heimat nët geléist.

Ech wëll awer op eppes opmiirksam maachen, an dat wir da méng drëtt Remarque. Dat sin all déi Wunnflächen, déi duerch Büroë besat sin.

Hei an der Châmber hu mer eng Motioun gestëmmt, dass de Stat keng Wunnfläch méi als Büro diirf transforméieren.

Mir als Châmber sëtzen an esou Haiser. D'Deputéierte selwer hu Büroën an esou Haiser, wou fréier Wunnfläch wor. Ech hat dorophin eng Fro un d'Regierung gestallt, an du krut ech geäntwert, de Stat géng keng Immeuble lounen, wou Wunnéngen dra wieren. Ech weess, wat si maachen! Si stellen e Propriétaire un, dat als Büroën ze transforméieren, an da lount de Stat et als Büroën, mä do ware virdru Wunnéngen dran!

Ech kucken de Rapport d'activité vum Ministère d'Etat iwwer d'Loyerskommissioun. Do steet dran, dass um Territoire vum der Stad Lëtzebuerg de Stat 139.000 Meter Carré Surface gelount huet op 126 verschiddenen Adressen. Do si ganz bestëmmt vill Büroën ënnerbruecht an Apparte-

menter, déi fir Wunnzwecker gebaut gi sin, an nët fir Bürozwecker.

Wann elo ëmmer méi Büroë beispillsweis um Kiirchbiere gebaut gin, wéi dat nach gëschtër de Fall wor bei der Grondsteenleung vum Gebai vum enger Bank, wou de Minister vum den Travaux publics gesot huet, dat géng d'Stad décongestionnéieren, well da kéime jo all déi Aarbechtsplazen aus der Stad eraus op de Kiirchbiere, sou as dat awer en Trugschluss, well déi Büroën hei an der Stad gi jo dann erëm vum anere Beamte besat!

Et sin eng ganz Parti Büroën, déi kann een nët ëmfunktionnéieren als irgendeppes anesches, a bestëmmt nët a Wunnéngen.

Ménger Menung no soll de Stat fir déi Wunnéngen, déi en occupéiert mat Büroën, wiirkelech op de Bürosmaart goen, sech do alounen an domat déi Appartements eidel maachen, déi ursprüngelech Wunnéngen waren. Da krite mer op jidder Fall mëtten am Kär vum der Stad eng ganz Parti Wunnéngen fräi, déi da fir Logementen kënnten zur Verfügung stoen.

Ech muss Iech soen, ech wor erfieert, wéi ech dee Chiffer vum 139.000 Meter Carré gelies hun, déi eleng de Stat um Gebitt vum der Stad Lëtzebuerg gelount huet. Et wir nawell gutt, wann déi Proposition de loi hei an der Châmberskommissioun diskutéiert gët, wann si sech géif Opschloss gi loosse vum der Regierung, wéi d'Qualitéit dovunner as, wivill Bürosgebaier a wivill Wunnhaiser dat sin. Och hei misst de Stat mam gudde Beispill virgoen.

Ech soen Iech merci.

M. le Président.- M. Krecké demande encore la parole.

M. Jeannot Krecké (LSAP).- Här President. Ech hat zwar gemengt, ech géif näischt méi dozou soen, mä déi lescht Ausso vum der Mme Brasseur verleet mech awer derzou, fir eppes musse kloerzestellen.

Et as ganz luewenswäert, wann d'Mme Brasseur verlaangt, dass de Stat soll Rechnung ofleën iwwer déi Büroflächen, déi en a Raim besetzt, déi fir Wunnéngen do sin. Wann ech dat awer ganz ënnerstëtzen, da froen ech natiirlech genau dat selwecht vum der Stad Lëtzebuerg, déi jo eng ähnlech Démarche huet.

Ech gin dervun aus, no der Propos, déi d'Mme Brasseur hei gemaach huet, fir all Quadratmeter opzelëschen, deen de Stat gebraucht, dass selbstverständlech och d'Stad Lëtzebuerg, ouni dass d'Oppositioun do muss virgoë mat enger Motioun, dat virleet an esou mam gudde Beispill virgeet. Ech hu guer keen Zweifel dorunner.

Ech wollt dat jhust nach eng Kéier kloerstellen.

M. le Président.- Le prochain point de notre ordre du jour prévoit la proposition de loi 3762 de l'honorable M. Robert Mehlen.

La parole est à l'auteur de la proposition de loi, à l'honorable M. Robert Mehlen.

13. Proposition de loi 3762 de M. Robert Mehlen tendant à instituer un référendum d'initiative populaire

M. Robert Mehlen (ADR), auteur.- Här President. Ech wëll direkt an den Thema asteigen, well méng Zäit limitéiert as an et awer eppes as, zu deem ee vill ze soen huet.

Woufir dës Proposition de loi? Dofir gët et e puer Ursaachen:

1. d'Absicht, de Bürger a wichtige Fäll méi direkt un der politescher Verantwortung deelhuelen ze loosse, dat heescht, eisen demokratesche System auszubauen, an ze beliewen;

Vill Leit fille sech frustréiert, well si all 5 Joer während enger Minutt hire Walziedel därfen ausfüllen an dann hire politesche Pouvoir fir 5 Joer an d'Hänn vu Leit geluegt hun, déi duerno ganz dacks maachen, wat hinnen an obskure Parteizentrale virgeschriwwé gët.

De rengen parlamentaresche System huet als grouss Schwächt, datt de Wieler zwar enger politescher Kraaft oder eenzelne Kandidat seng Stëmme gët, awer bei der Diversitéit vun de Problemer an de Walprogrammer seng Meinung an dësem oder deem Problem esou nët däitlech zum Ausdrock bréngen kann.

Et as dofir an eiser Zäit vun der totaler Kommunikatioun noutwendeg, fir de chemesch rengen parlamentaresche System duerch eng Ouverture zu méi direkter Matbestëmmung duerch d'Vollek ze complétéieren.

2. d'Ursach, datt eis Konstitutioun zwar am Artikel 51 virgesäit, duerch eng Ännerung, déi den 21. Mee 1948 virgeholl gin as, dass e Referendum kann ofgehale gin, ënner Konditiounen, déi an engem Gesetz festzehale wären;

Sou e Gesetz as bis haut nach nët a Kraaft gesat gin an et besteet och, ménges Wëssens, de Moment keng Initiativ, déi esou e Gesetz géng erbauféieren.

Wann een den Text vun där Bestëmmung am Artikel 51 genau liest, da stellt een allerdings fest, dass de Législateur deemools éischter de Referendum am A hat, deen op Initiativ vun der Regierung sollt ofgehale gin, sou kënnt een et weinstens liesen: « Les électeurs pourront être appelés à se prononcer par la voie du référendum. » Dat as den Artikel 51, Absatz 7.

Op engem aneren Niveau as esou eng Méiglechkeet geschafe gin, an zwar um Niveau vun de Gemengen. Am Gemeindegesetz vum 13. Dezember 1988 as d'Méiglechkeet vun engem Referendum festgehale gin, souwuel op Initiativ vun dem Gemeinderot, wéi och op Initiativ vun de Leit.

Niewebäi gesot, ech hun d'Éier, aus där Gemeng ze kommen, wou deen éischte Referendum ofgehale gin as. Et war eng interessant Experienz, méi wëll ech hei nët soen, mä d'Vollek huet jiddefalls do an engem Punkt ganz däitlech säi Wëllen zum Ausdrock bruecht.

Eng éischt fundamental Fro, déi sech an deem Zesammenhang stellt, dat as déi: Wëlle mer d'Vollek méi direkt un dem politesche Liewen hei bedeleen? Wëlle mer dem Vollek méi Matbestëmmung zougestoen oder nët?

Eng zweet fundamental Fro, déi ze diskutéieren as, as déi: Soll d'Initiativ eleng vun der Regierung ausgoen, sou wéi een dat elo kënnt an den Text eran interpretéieren? Ech wëll dat awer opstoë loosse. Oder soll een och dem Vollek d'Méiglechkeet gin, esou e Referendum ze froen, ënner Konditiounen, déi een natierlech misst festleën?

Wann d'Initiativ vun der Regierung kënnt, da besteet ménger Meinung no kee verfassungsméissege Problem, mä et besteet de Problem, datt kaum esou eng Initiativ wäerd kommen. Mir hun dat jo eréischt kurz erlieft.

Wann d'Initiativ vum Vollek soll ausgoen, da muss een d'Fro stellen, ob den Artikel 51 vun der Konstitutioun a séngem jëtzege Wuertlaut nët misst geännert gin. Et gët allerdings ganz valabel Juristen hei am Land, déi der Meinung sin, dat bräicht nët gemaach ze gin.

Eng Fro, déi vill méi wäit geet, as déi, ob een nët och eng Verfassungsännerung kann oder soll duerch e Referendum erméiglechen. Et as och déi Fro, déi déi lescht Zäit e bëssche Wëlle geschloen huet.

Déi aktuell Prozedur vun der Verfassungsännerung as relativ schwéierfällg. Doriwwer, mengen ech, si mer eis alleguer eens. Dat as awer waarscheinlech bewosst geschitt, fir ze verhënnere, dass iwwerstiirt an oniwwerluegt Ännerunge vun eisem Grundgesetz solle virgeholl gin.

Déi Prozedur huet ganz sécher nach en interessanten Aspekt, d'Bestëmmung am Artikel 114 nämlech, datt d'Chamber de plein droit ogelést gët, wann d'Artikelen désignéiert sin, déi sollen zur Revisioun fräigesat gin.

Et as kloer, dass do d'Absicht zum Virschäin kënnt, dass de Wieler soll doriwwer befragt gin, dat heescht, datt een zrëck bei d'Vollek geet, ier een d'Grundgesetz därf änneren.

Den Nodeel vun där Prozedur as ganz sécher deen, datt an der Walcampagne, déi duerno stattfënt, iwwer allméiglech Problemer geschwat gët, mä meeschtens nët iwwer déi Verfassungsreform, déi och nach soll gemaach gin. An där Walcampagne fënt eng Verméschung vun allméiglechen Elementer statt, vu verschiddene Punkten och an der Verfassungsännerung.

Mir wëssen, datt meeschtens ganz vill Artikele fräigestallt gin zur Revisioun an datt do de Wieler nët méi kloer säi Wëllen kann zum Ausdrock bréngen. Hie wielt seng Parteien oder seng Kandidaten, sou wéi hien dat fir richtig fënt, mä en huet am Fong geholl nët d'Geleënheet, sou wéi dat soll sin, fir sech zu dene Punkten, wou eist Grundgesetz soll ofgeännert gin, ze äusseren.

D'Verfassung as awer d'Grundgerüst vun eisem Rechtsstat, an dofir sin ech och der Meinung, datt et absolut richtig as, dass d'Vollek bei denen Ännerunge konsultéiert gët.

Et wär awer nach méi richtig, an doriwwer misst ee sech dann ënnerhalen, wann d'Vollek bei Ofännerunge vun der Verfassung méi direkt a méi prezis géif gefrot gin, wéi dat bis elo virgesi war. Dofir hu mir och esou eng Prozedur an eiser Proposition de loi virgesinn. Dat huet schon am Virfeld zu allerlee Oprengung gefouert, well et verfassungsrechtlech esou nët duerchféierbar wär. Ech ka soen, ech hu kee Problem, fir déi Argumenter, déi do an d'Feld gefouert gin, unzëerkennen, wat dës Volet ubelaangt.

Et muss awer eng Kéier en Ufank gemaach gin. Mat dëser Proposition de loi gët e politesche Paweestein an d'Waasser gehäit, deen zum Zweck huet, d'Diskussioun ëm d'Realisatioun vu méi direkter Demokratie an de Gank ze bréngen.

D'Artikelen 114 an 51 weinstens, méiglecherweis och nach anerer vun der Konstitutioun, misste geännert gin, fir op d'manst en Deel vun dëser Proposition kennen a Kraaft ze setzen. Déi si fir dës Legislaturperiod awer nët revisabel erkläert, kënnen dofir virum 12. Juni 1994 nët geännert gin.

Et as awer wichteg, dass mer d'Diskussioun doriwwer ufänken an, wann de politesche Wëllen dozou besteet, déi Artikele revisabel erklären, déi vun esou enger Ännerung betraff wären. Dat as och den Zweck vun dëser Initiativ.

Et gët nach en drëtten Punkt, deen ech hei wëll uschneiden, den eis derzou gefouert huet, fir dës Proposition de loi ze maachen.

3. d'Frustratioun, déi sech am Vollek breetmécht, well vill Initiativen, déi vum Vollek ausgin, leie bleiwen oder am Tirang verschwannen.

Mir hun als Aktiounskomitee 5/6 deemools nach zwou Initiative fir e Referendum geholl:

1. fir d'Afëierung vun enger Volleksversécherung am Pensiounswiesen;

Deemools waren 8.310 Ennerschrëfte gesammelt gin. Déi sin hei ofgi gin, an et as duerno näischt méi geschitt.

2. fir e Referendum ofzehalen iwwer den Traité vu Maastricht;

Ouni dass mer grouss intervenéiert hun, waren dat Ennerschrëften, déi op Egeninitiativ vun dene Leit komm sin, an zwar 3.459 Ennerschrëften an Zäit vun 8 Deg. Et as awer näischt geschitt.

Ech sin der Iwwerzeugung, dass d'Fro vun der Rentenongerechtheet hei am Land iwwer de parlamentaresche Wee bal nët ka geléist gin, soulaang wéi eng Majoritéit vu Vertrieder vun der Fonction publique esou eng Solutioun blockéieren. D'Majoritéit vum Vollek as awer der Meinung, dass eng Solutioun Volleksversécherung, dat heescht, Gläichbehandlung, misst kommen.

Geet dat dann iwwer Walen? Mir wëssen, dass bei Walen och aner Theme mat eraspillen, dass do ganz aner Elementer leschten Enns d'Décisioun beaflossen. An dofir wir et dringend noutwendeg, d'Méiglechkeet vum Referendum ze schafen.

An der Vergaangenheet huet et zwee Referenden hei am Land gin, dee vun 1919 a vun 1937.

1992 war eng weider Geleënheet gewiescht, fir an enger fundamentaler Décisioun an der Geschicht vun eisem Land d'Volek ze consultéieren.

Eis Regierung war zwar der Meinung, d'Vollek wir ze domm, an dofir huet se dat och nët gemaach.

An Dänemark, a Frankräich an an Irland waren d'Regierungen allerdings anerer Meinung.

D'Violatioun vun der Verfassung as an dësem Fall geschitt. Ech wëll keng Wieder doriwwer verléieren, well méng Zäit ofleef. E Referendum hätt eis awer d'Méiglechkeet gin, fir eis iwwer all déi verfassungsrechtlech Problemer, un dene mer eis gestouss hun an iwwer déi mer och haut nach nët ewech sin, a wou souguer Leit, déi dat hei matgestëmmt a matgedroen hun, sech selwer ukloen, d'Verfassung war gebrach gin, ewechzehëlfen.

(Interruption)

Enfin, Dir musst d'Responsabilitéit doriwwer droen, wat Dir deemools gemaach hut!

Mir hu virgeschloen, dass e Referendum op Initiativ vum Vollek muss duergedouert gin, dat heescht obligatoresch as, wann 3.000 Wieler oder 50 politesch Mandatairen, dat heescht, Deputéierten oder Gemengevertrieder, dat froen.

Am Fall, wou een d'accord war, fir och d'Konstitutioun oder international Traitéen iwwer esou e Wee ze änneren oder ratifizéieren ze loossen, misst déi Zuel awer eropgesat gin op 7.500 Wieler oder 100 Mandatairen.

Iwwer déi Zuele léisst sech selbstverständlech diskutéieren.

Mir hun och e Blokus agesat, dat heescht, 12 Méint virun an no Wale soll kee Referendum dierfe stattfannen, well jo dann d'Leit sech souwisou kënnen äusseren.

Et as och eng Fënnfjoerwartefrist dran, wann e Referendum iwwer déi selwecht Fro zréckgewise gin as.

D'Procédure préalable, eng éischt Initiativ, ka geholl gin op d'manst duerg 750 Wieler. Dovunner dierfen nët méi wéi d'Halschent aus engem Walbeziirk kommen.

Geet d'Regierung op d'Proposition vun dësem Groupe an, an adoptéiert en entspriechend Gesetz, dann eriwweegt sech déi weider Prozedur. Geet si nët drop an, leeft d'Prozedur weider, dat heescht, d'Publikatioun am Memorial vun där Fuerderung, déi dem Refendum soll ënnerworf gin.

Bannent 14 Deg no der Publikatioun kréien d'Leit d'Méiglechkeet, sech op de Gemengen zu där Proposition ze äusseren. Wann do genuch Ennerschrëfte beienekommen, da muss déi Proposition weidergeleet gin, da muss d'Prozedur un d'Lafe kommen.

Et as nach e ganze Volet do, iwwer deen ech och misst schwätzen. Ech kann dat leider nët méi maachen, well méng Zäit ofgelaf as. Dat as de Volet vun der direkter Applikatioun duerg d'Chamber oder nët. Ech si mer bewusst, dass do och verfassungsrechtlech Schwiregkete sin, dass een awer, wann een dat wëllt maachen - an ech mengen, et soll een op de Wee vun enger méi direkter Demokratie goen - da misst ee sech awer elo iwwerleën, wa mer un d'Verfassungsreform kommen - ech hoffen, dass dat an dëser Legislatur nach geschitt - wat fir eng Artikelen een zur Revisioun fräigët.

Sou wäit déi Proposition, déi jo am Virfeld scho fir vill Diskussioun gesuergt huet. Ech wëll heimat ménger Hoffnung Ausdruck gin, dass d'Diskussioun sech nët a steriler Buschtaweiderei verfäkt, mä dass wiirlech e seriösen Débat iwwer d'Verwirklechung vun der direkter Demokratie hei am Land an de Gank kënnt, an d'Chamber dann an der Folleg och bereet as, déi Verfassungsartikelen, déi missten au préalable geännert gin, zur Revisioun fräizegin.

Wann dat nët geschitt, da gin erëm eng Kéier 5 Joer an d'Land, ier déi nächst Chance, fir esou eng Reform ze verwirklechen, sech erëm eng Kéier stellt. Dofir hoffen ech, dass Der favorable op déi Proposition hei agitt.

Ech soen Iech merci.

M. le Président.- La parole est maintenant à l'honorable M. François Colling.

Débat

M. François Colling (CSV).- Här President, Madame, dir Härren. Den Här Mehlen huet séng Proposition de loi virgestallt an direkt gesot, dass se an där Form, wéi se elo proposéiert gin as, verfassungswiddreg as. Doriwwer léisst sech nët diskutéieren, dat as ee Fait. E proposéiert, dass een d'Artikelen 114 an 51 misst als revisabel erklären.

Déi éischt Remarque, déi dozou ze maachen as, as dass een effektiv d'Verfassung muss ëmänneren. Et si Leit, déi géife soen, et bräicht een et nët ze maachen, anerer sin der Meinung, et misst een et maachen. De Pierre Majerus as doriwwer ganz klar. Den Artikel 51 as bekannt, dee seet: « Les électeurs peuvent être appelés à se prononcer par la voie du référendum dans les cas et sous les conditions à déterminer par la loi. »

De Pierre Majerus seet: « Le référendum introduit par la révision de 1919 est facultatif pour le législateur et pour lui seulement. Le peuple n'a pas le droit de le demander. »

Wann et bei d'Juriste geet, da wësst Dir, dass ëmmer zwee Points de vuën erauskommen.

Dëst as eng Fro, déi léisst sech diskutéieren, mä nët op déi Aart a Weis, wéi Dir dat hei proposéiert. Ech mengen, um Niveau vun de Gemengen hu mir ee Referendum agefouert. Dir sid jo selwer an enger Gemeng, wou Dir sot, dass dat scho probéiert gin as. Dat as eng Initiativ, wou um Niveau vun der Gemeng, déi eng oder déi aner Saach soll realiséiert gin. Do stëmmt ee mat jo oder mat neen.

Wat Dir hei proposéiert: « Un référendum d'initiative populaire peut modifier la Constitution, adopter ou refuser d'adopter les traités internationaux, les lois budgétaires et les lois relatives à l'élection des députés et des membres des conseils municipaux ». Dir hut och eng Rei vu Modalitéiten agebonnen.

Wann Dir wëllt esou wäit goen, da géif ech Iech proposéieren, den Artikel 9 nach derbäi ze setzen. Den Artikel 9 war da ganz kuurz: « La Chambre des Députés est abolie », well da brauche mir keng Châmber méi. Dat as dann déi ganz direkt Demokratie. Alles wat gemaach gët, gët iwwer Referendum ofgestëmmt.

Et steet nach hei, dass Texter virgeluegt gin, dat wäeren da Propositionen oder Projeten, a wann d'Deputéiert nët domat d'accord sin an et gët ofgestëmmt, da musse mir higoen an dat exekutéieren, wat d'Vollek an engem Referendum decidéiert huet.

Dir kënnt Iech elo d'Fro stellen, wat mir dann nach hei solle maachen, well en fin de compte si mir iwwerflësseg gin. Ee Referendum kann nët bindend sin. Dat as ee vun de fundamentale Prinzipien vun eisem System.

Et kann ee wielen tëschent engem Schwäizer System, an och do as dat esou, oder engem vun Italien oder Eisträich, wou de Référendum d'initiative populaire genau geregelt as, mä dat hei, dat géif eise System total op d'Kopp stellen.

(Interruption)

Da maacht eis eng Proposition fir d'Châmber ofzeschaffen. Wann Dir dat éierlech zougitt, da brauche mir nët méi ze diskutéieren. Et geet nëmmen nach drëm, ob mir nach solle bestoe bleiwen als Châmber oder nët.

Mir sin der Meinung, dass d'Châmber soll bestoe bleiwen, an hir Prérogativen anhalen.

Mir hun dräi Referendumë bis elo organiséiert. Dee leschte war 1937. Wat dobäi erauskomm as? An engem Fall huet ee gesinn, dass d'Deputéiert nach anescht decidéiert hun, wéi d'Vollek ofgestëmmt huet.

Dir sot, déi Initiativ hei as ee « Pavé dans la mare ». Jo, ech weess zwar nët a wéi eng Mare dass et as, mä op alle Fall mir als CSV kënnen esou eng Proposition wéi déi hei, déi dorop erausgeet, fir eise ganze parlamentaresche System a Fro ze stellen, op kee Fall ënnerstëtzen.

M. le Président. - La parole est à l'honorable M. Meintz.

M. Carlo Meintz (DP). - Här President, Madame, dir Hären. Den Auteur vun der Proposition de loi huet scho Recht, dass et nët duergeet, fir iwwer dee wichtege Problem, deen eng fundamental Diskussioun iwwerhaapt iwwer de Fonctionnement vun eiser parlamentarescher Demokratie duerstellt, an zéng Minutten ze schwätzen. Ech wëll nëmmen

e puer Remarque maachen an un dat uknäppen, wat, an enger anerer Form, de Fränz Colling gesot huet.

Eis politesch Aktioun an dësem Land as opgebaut op ee System, an deem mir eng indirekt Demokratie hun, wou de Wieler sech séng Leit eraussicht, déi fir hien, a sénger Plaz, ee kohärente politesche Programm duerchzéien. Dat as ee vun dene wichtege Punkten. Et geet nët ëm eenzel Aspekter vun der Politik, et geet ëm déi gesamt Politik, déi sech vun der Kultur iwwer d'Fiskalpolitik hinzitt. Dofir as et scho wichtig, dass ee vun Ufank un de System a Betracht zitt, dee mir de Moment hun, an et kann een nët eng Demokratie mat zwee Systemer niewentenee funktionnéiere loosse.

Trotzdem as der DP d'Iddi sympathesch, fir dem Wieler selwer et ze erlaben, bei verschiddene wichtege Décisionen, sech iwwer de Wee vun engem Referendum kënnen ze äusseren.

Et as an deem Sënn, wou mir mat der Aktioun vum Här Mehlen, deen dës Proposition de loi néiergeluegt huet, d'accord sin, well mir fannen, dass et den Ufank as vun enger Reflexioun an dësem Problem, mä dass et wierklech nëmmen den Ufank as, well et as nët esou einfach. D'Proposition de loi, wéi se elo virläit, déi geet nët duer, fir dëse Problem op engem ganz proppere Wee an op eng ganz propper Manéier ze léisen.

Mir hun d'Méiglechkeet, an dat as e puermol ervirgehewe gin, een allgemengt Gesetz ze maachen, mä ech sin nët der Meinung, dass een do muss een allgemengt Gesetz bréngen, well den Artikel 51 virgesäit, dass een ee Referendum iwwer all Méigleches ka maachen, wat d'Châmber eng Kéier decidéiert, an dann de cas en cas ee Gesetz iwwer dee Referendum dee Moment muss geholl gin.

Wat hei nei as, dass nët nëmmen d'Châmber dee Referendum ka froen, mä dass et och eng Initiative populaire ka sin. Mir sin d'accord, fir déi Iddi ganz seriös ze analyséieren, an dann een ee Wee muss fannen, wéi een dat kann an deen anere System abauen, well esou, wéi d'Proposition de loi de Moment hei läit, as et eis leider nët méiglech se ze stëmmen, well si as zevill onkomplett, zevill onklar an et sin zevill Lücken dran. Dofir krut den Här Mehlen scho virgehäit vu verschiddene Leit, si wär anticonstitutionnelle. Mä do as et klor - dat huet den Här Mehlen och gesot - dass een dann eben och déi Artikele muss änneren.

D'Prozedur déi muss verschiddene Grondprinzipien awer Rechnung droen, fir dass et iwwerhaapt sérieusement ze envisagéieren as, fir esou eng politesch Form anzeféieren.

Beim Déclenchement vun där ganzer Prozedur gin no der Proposition vum Här Mehlen 750 Wieler duer. Mir haten 1989 bei de Wale 217.379 Wieler. Wa mir dat elo an Unitéiten alles ëmrechnen, dann hu mir fir een Deputéierten 3.623 Wieler. Wa mir heibannen eng aarmséileg hongreg Motioun wëllen deposéieren, da brauche mir fénnef Deputéierten. Wa mir dat an eisen Unitéiten ëmrechnen, da brauche mir op d'manst 18.115 Wieler fir kënnen eng Motioun ze deposéieren. Et geet dann awer nët, dass mir esou ee groussen Apparat a Bewegung setzen mat 0,3% vun de Wieler, déi mir am Land hun. 0,3% géif duergoen, fir esou ee schwerwiegende Prozess a Bewegung ze setzen.

Ech ka mech ni mat deem Gedanke familiariséieren, dass een een Amalgame mécht tëschent Wieler op där enger Säit an Eluën op där aner Säit, entweder sin et d'Wieler, déi dee Referendum kënnen froen oder et sin d'Eluën, an da maache se et hei. D'Eluën sollen et nët dobause maachen, et as grad esou onlogesch, wéi wann een Deputéierten eng Petitioun

ënnerschreift, déi un d'Chamber gericht as. Deen huet jo d'Méiglechkeet, fir dat hei ze maachen.

D'Chamber, mengen ech, muss nach ëmmer dee Punkt bleiwen, an dat steet an alle verfassungsrechtlechen Abhandlungen, wou d'Fro, d'Form an alles geregelt gët, an d'Regierung muss et dann herno duerchféieren.

D'Fro vun der fakultativer oder obligatorescher Participatioun vun de Leit, déi hänkt och domat zesummen, op wat fir een Niveau een den Acte de déclenchement setzt, a wat een och dovun erwaart.

Et kann ee mat denen zwou liewen, dass ee seet, d'Leit kënnen fakultativ oder d'Leit mussen, esou wéi an eisem Walsystem, obligatoresch un engem Referendum deelhuelen. Mä eppes muss awer garantéiert sin, datt d'Zuel vun de Leit, déi deelhuelen, signifikativ as. Datt se also op d'manst iwwer 50% läit, well mir brauche jo 50% fir ee Gesetz ze stëmmen, da muss dat och esou dobausse sin, an dofir as et ganz klor, datt mir an eisem System nët kënnen de Schwäizer System iwwerhuelen, wou ee mat 18 a manner Prozent vun den Electeurs ka souguer ganz wichteg Gesetzer huelen, besonnesch bei Verfassungsännerungen as dat nach ganz ansicht.

Och d'Fro, ob d'Resultat bindend soll sin oder nët, hänkt vun der Participatioun a vun der Formulierung am Gesetz of. Et as ganz klor, wann ech eleng déi dräi lescht Froen huelen, datt et an där globaler Riedenszäit vun zéng Minutten nët méiglech as, fir doriwwer ze schwätzen.

Eis Konklusioun: Mir si mat der Diskussioun a mam Ufänke vun der Diskussioun d'accord. Mir sin och op, dass een op dee Wee ka goen. Mir hätte gär, datt dat an déi parlamentaresch Demokratie agebaut gët, datt et och no baussen nët dat gët, wat de Fränz Colling gefaart huet, einfach d'Negatioun vun deem System, dee mir elo hun. Dofir kënnen mir d'Proposition de loi nët stëmmen, mä mir kënnen awer un der Diskussioun deelhuelen, a vläicht kënn souguer d'Kommissioun vun der Révision constitutionnelle sech deem Problem unhuele.

M. le Président. - La parole est à l'honorable M. Jean Asselborn.

M. Jean Asselborn (LSAP). - Här President. Et deet mir leed, wann ech vläicht bei där Proposition de loi, déi héchstwahrscheinlech déi wichtegst as vun haut, e wéineg méi klor schwätzen, wéi dat virdrun hei gemaach gin as.

Wann ech d'Ausféierunge vum Auteur vun där Proposition de loi liesen an nogelasscht hun, da kënn een, ouni zevill Imaginatioun mussen ze hun, an och nët ouni zevill schlechte Wellen ze hun, zur Konklusioun kommen, dass den Här Mehlen undeite wëllt, dass eis Demokratie, esou wéi mir se haut praktikéieren, lauter Frustratioun an Ongerechtegkeet produzéiert.

Schold sin d'Politiker alleguer, mat Ausnam natiirlech vum ADR. D'Heelmëttel as de Referendum.

Ech wëll iwwer dës Produktioun nët zevill eng déif Analys maachen, well um juristesche Plang as se, a méngen Aen, komplett derniewent. Ech gin iech zwee Beispiller.

Eis Verfassung, déi as an 150 Jor gewuess, a si as esou gewuess, dass mir haut glécklecherweis an enger repräsentativer parlamentarescher Demokratie liewe kënnen, wouriwwer déi meescht Länner op der Welt eis beneiden, a wou d'Chamber, déi vum Vollek gewielt an dem Vollek och Rechenschaft schëlleg as, eng legislativ Aufgab huet, an déi

Aufgab, déi besteet doran, Gesetzer guttzeheeschen a Gesetzer ze änneren.

Duerch dëst soll elo d'Chamberaarbecht permanent op de Kapp kënnen gestallt gin. 3.000 Leit am Land, dat as manner wéi 1% oder - an dat as dat Schéinst - 50 Gemengeconseilleren kënnen ee Referendum froen. 50 Gemengeconseilleren, dat as de Conseil vun der Stad Lëtzebuerg, dee vu Mamer an dee vu Stengefort. Wann déi d'accord sin, dann ënnerschreien déi, an da muss ee Referendum stattfannen.

D'Maulkuerfgesetz as duerch ee Referendum gekippt gin, glécklecherweis, mä et darf een awer nët aussergewéinlech Prozeduren, an aussergewéinlechen Zäiten, an ënnert aussergewéinlechen Emstänn banaliséieren a verallgemengeren. Mat eiser Verfassung, wéi se haut as, kann zu all Moment d'Prozedur vum Referendum beim Maulkuerfgesetz sech widerhuele.

Eng zweet Saach: Duerch ee Referendum, esou dës Proposition, kann d'Verfassung geännert gin, international Traitéen kënnen ugeholl gin, an de Budget ka gestëmmt gin. Den Här Colling huet gesot, d'Chamber kënn ofgeschaaft gin, och de Grand-Duc. Ech mengen, et géng alles an engems goen. Et kéint ee vläicht och duerch Referendum festhalen, dass am Januar sollt de Summer ugoen, an am Juli de Wanter. Alles wär méiglech duerch Referendum, wann een dat liest, mä, dir Dammen an dir Hären, da wire mir, fir dat elo seriös ze soen, nët méi an enger repräsentativer parlamentarescher Demokratie.

De Referendum, dat as a méngen Aen op jidde Fall kee Spillball, fir de Leit virzetäuschen, dass een der Demokratie nei Elanen eleng mam Referendum kënn gin. Am Parteiprogramm vun der LSAP do stong, an et steet och nach dran, dass de Referendum soll agesat gin, fir eis Demokratie ze festegen.

Ech wëll, an där kuurzer Zäit, déi mir hei zur Verfügung steet, e puer Avantage vum Referendum opzielen:

1. Dass eng breet Diskussioun provoziert gët iwwer ee Problem oder iwwer eng politesch Virstellung.
2. De Buerger, dee kritt séng Meinung direkt gefrot, a séng Meinung zielt. Dat as ee psychologesche Problem, deen do matspillt.
3. Dee Referendum - an dat as a méngen Aen dat Wichtigst - hëlleft Situatiounen deblockéieren, wou Décisiounen da vun enger breder Meinung an der Öffentlechkeet kënnen gedroe gin.

De Referendum huet awer och kapital Nodeler:

1. Et as eng Photographie vun der öffentlecher Meinung, déi selbstverständlech an der Vériditéit all Sondagen iwwertrëfft zu engem gewëssenen Zäitpunkt x, wou allerdings ganz dacks, an do kënn Dir Studien, déi iwwer de Referendum gemaach gi sin, noliesen, de Wieler sech d'Recht hält, fir nët op d'Fro ze äntweren, mä ganz einfach sech d'Fro ze stellen, firwat dass elo een aneren him eng Fro gestallt huet.

Dat heescht also, dass beim Referendum d'Manipuléierbarkeit ganz grouss as, an deen, dee Champion dora war, dat war den de Gaulle a Frankräich, deen tëscht 1958 an 1969 de Referendum ëmmer als Plébiscite dohinner gestallt huet, ëmmer d'Saach an den Hannergrond gestallt huet, mä fir séng Persoun, fir sech ze bestätegen, huet en de Referendum gemaach, allerdings mat aller Konsequenz, well en as am Abrëll 1969 doriwwer gestolpert.

(Interruption)

Eng aner Saach - an dat as d'Fro - wéini, an op wat fir eng Fro een allgemeng soll ee Referendum aféieren. Dat as eng Fro, déi och a méngen Aen äusserst schwéier as. Jiddendfalls an eisem System, wéi e gewuess as, wéi mir e kennen, an dat as deen, dee vill Länner hun, do as d'Châmber souveraine.

Alles wat am Referendum an duerch ee Referendum géif direkt zu enger legislativer Décisioun féieren, dat as verfassungswiddreg.

Ee Referendum kann no eiser Verfassung - dat as elo zéngmol gesot gin, ech huelen un, dass dee Leschten dat elo kappéiert huet an och den Auteur - nëmme berodende Charakter hu fir d'Châmber, anerefalls rutsche mir an een anere Regim, esou einfach as et.

Politesch gesinn, wann een d'Belsch kuckt, an et kuckt een denen hir Problemer, oder Däitschland, do gesinn ech nët, éierlech, wéi een d'Stabilitéit am Stat an an den Diskussiounen géing behalen, wann d'Gefor dauernd géif bestoen, dass d'Gesetzer, déi mir an der Châmber maachen, a mir wëssen ënnert wat fir enge Konditiounen dass déi heiansdo zoustane kommen, wéi laang Zäit dass dat brauch, dass déi kënnen zerrappt an zerfleescht gin, eleng duerch d'Méiglechkeet eng Prozedur ze déclenchéieren, déi dëst erëm a Fro stellt. An der Belsch as ni esou ee Wee ageschloe gin, wou d'Verfassung am ähnlechten as, wéi déi vun eis.

Et as hei ugedeit gin, dass Maastricht bei dëser Proposition de loi wénkt. Et gët Leit, déi nët opgin, fir der Öffentlechkeet wëlle klor ze maachen, dass mir besser hätten nët bei denen zéng Länner ze si vun denen zweielef, déi Maastricht ratifizéiert hun, mä ee Referendum darf nët dozou dinge, Problemer, déi Parteien oder Majoritéiten bei engem wichtige Punkt hun oder feststellen dass se se op emol hun, fir déi ganz einfach op de Wieler ofzewälzen.

Ech mengen, dass nët nëmme hei zu Lëtzebuerg et onméiglech wir, entgéint deem wat den Här Mehlen gesot huet, eng Krankekeessereform oder dringend Problemer oder Moosnamen a Saachen Environnement oder Planification hospitalière oder Mediengesetz an esou weider duerch ee plakege Referendum ze léisen. Dat gët et nët op der Welt. Wa mir dat hei zu Lëtzebuerg géifen erfannen, da wär ech och fir de Referendum.

Mir géifen de Leit eppes virspillen, wat an der Realitéit guer nët opgeet.

E Referendum kann a méngen Aen awer derzou dinge, de Wieler bei enger wichtiger Décisioun anzebezeien, wann eng Situatioun entsteet, wou de Pro an de Kontra sech nët kloer kënnen départagéieren.

Bei Maastricht ware jo méi wéi 5/6 vun alle Volleksvertreieder hei an der Châmber derfir, folglech och déi grouss Majoritéit vun de politesche Stréimungen hei zu Lëtzebuerg. An dat ware jo bekanntlech déi Leit, déi vum Vollek hei an d'Châmber geschéckt gi sin.

Also de Referendum als Arbitter, jo, bei gréissere Problemer vun nationalem Interessen, fir eng kloer Décisioun kënnen erauszeschelen, wann et schwéier as, déi fäerdegzebréngen!

Mä Ierféierung a Manipulatioun vum Wieler allerdings iwwer de Wee vum Referendum, well gewielte Politiker sech esou laansch Beschless drécke wëllen, dat as der Demokratie nët dénglech!

Ech soen Iech merci.

M. le Président. - La parole est maintenant à l'honorable M. Jean Geisbusch.

M. Jean Geisbusch (GAP). - Här President, Madame, dir Härren. Wann den Här Mehlen am Exposé des motifs zu sénger Proposition de loi schreift, den Décalage zwëschen der Classe politique an de Biirgerinnen a Biirger géing ëmmer méi grouss gin, da kënne mir dat nëmme mat him feststellen.

D'Existenz vun ëmmer méi Biirgerinitiative weist op grondlegend Mängel vun der representativer Demokratie hin. An deem Sënn kann och fir ons de Referendum ee Moyen sin, fir d'direkt Demokratie ze verbessern, well en nämlech erlaabt, wichteg Entscheidungen an d'Hänn vun dene Beträffene selwer ze leën.

D'GAP huet och schon, vun un datt se besteet, vun 1983 un an all hire Programmer ëmmer erëm d'Verallgemeinerung vum Referendum gefrot.

Allerdings - an do si mer nët mam Här Mehlen d'accord - diirf d'Initiativ fir ee Referendum an onsen Aën nëmme vun de Biirgerinnen a Biirger ausgoen. Soubal een de Referendum och vu gewielte Vertreiederinnen a Vertreieder oder souguer vum Innenminister ausgoë léisst, da gët déi Volleksofstëmmung onweigerlech an déi politesch Machtkampf zwësche Majoritéit an Opposition eragezun an demagogesch entstallt.

De Referendum muss also eng total onofhängeg, de Biirgerinnen a Biirger virbehalen demokratesch Prozedur gin.

Eng zweet Remarque - an dat feelt och am Här Mehlen sénger Proposition de loi - betrëfft de Meinungsbildungsprozess während der Prozedur. Mir mengen, dass ouni e früie Meinungsbildungsprozess demokratesch Ofstëmmungen iwwerhaapt nët méiglech sin. Wann nämlech eng Fro zur Referendumsentscheidung usteet, muss eng zäitlech large bemoossen Informatiouns- an Diskussiounsphas vu mindestens 3 Méint an onsen Aën ageplangt gin. A Pro a Kontra müssen d'Méiglechkeet vun enger gläichberechtigter Duerstellung an der Öffentlechkeet kréien, an zwar an de Medien an eventuell och iwwer Informatiounsblieder, déi vun de Gemengen a vum Stat bezuelt gin.

Eng drëtt Remarque as déi, dass selbstverständlech de Referendum och eng bindend Wiirkung muss hun, well konsultativ Referenden oder onverbindlech Befrounge vum Vollek, dat sin an onsen Aë keng Erweiderung vun den demokratesche Matbestëmmungsméiglechkeet vun de Biirgerinnen a Biirger, mä si hun, besonnesch an Zäite vu verstärkter Biirgerprotesten, jhust eng Alibifunktioun. Si sin also héchstens derzou géigent, fir Biirgerinitiativen um institutionelle Wee an d'Eidelt lafen ze loossen an doduerch ze neutraliséieren.

Eng véiert Remarque betrëfft de Quorum. Onser Meinung no soll de Quorum engersäits Initiativen encouragéieren, awer anersäits och verhënneren, dass et zu Abüë kënnt. De Quorum diirft also nët zevill onrealistesche héich ugesat gin. Ons schwieft zum Beispill vir e Quorum vu 5% vun den erwuessenen Awunnerinnen an Awunner.

Als fënneften a leschte Punkt, vü dass mir jo och fir d'Walrecht vun den auslännesche Matbiirgerinnen a Matbiirger sin, as et fir ons selbstverständlech, dass si mat alle Rechter un der Referendumsprozedur kënnen deelhuele.

Elo zur Verfassungsméissegkeet oder nët. Ons Verfassung kennt zwar d'Arichtung vum Referendum, an dat as och

gesot gin hei am Artikel 51, Alinea 7. Et léisst sech awer weder aus der Formulierung nach aus der Stellung vun dëser Referendumsbestimmung an der Verfassung zwéngend ofleiden, dass de Referendum

1. bannend a rechtskräfteg as, an
2. eng nëmmen duerch Initiativ aus der Bevëlkerung zustanekomm Prozedur as.

Am Géigendeel, déi herrschend Verfassungsléier - dat as schon hei gesot gin, an dat kann een och beim Majerus noliessen - gesäit an der Loi du référendum, am Artikel 51 Alinea 7, nëmmen eng konsultativ Volleksbefragung vir, déi och nach eenzeg an eleng op Initiativ vun der Châmber stattfanne kann.

Mir sin dofir der Meinung, och wann d'Proposition Mehlen vläicht an onsen Aën nët komplett as a sech deelweis nët mat deem deckt, wat mir zu deem Punkt ze soen hun, dass et wichteg wir, wann dës Châmber nach virum Juni d'nächst Joer d'Artikelen 51 an 114 géif revisabel erklären, fir eng méiglechst breet Diskussioun an där Richtung ze garantéieren.

Ech soen Iech merci.

M. le Président.- L'honorable M. Nick Clesen a la parole.

M. Nick Clesen (GLEI). Här President, dir Dammen an dir Hären. Den Här Mehlen a séng Leit hu jo neierdings hire Parteinum gewiesselt an ADR, den « Aktionskomitee fir Demokratie a Rentegerechtegkeet ». Den honorablen Här Mehlen huet och gläich, fläisseg wéi mir hie kennen, véier Säite geschriwwen. D'Resultat as e Gesetzesvorschlag iwwer de Référendum d'initiative populaire.

Ech hu jhust e puer Minutten Zäit, fir dozou ze schwätzen; dofir géif ech och nëmme kuurz e puer Saachen uschneiden.

Dat éischt as, dass mir mam Prinzip vun engem Référendum d'initiative populaire d'accord sin.

Dat as näischt Neies. Mir Gring sin, zënter datt et eis gët, drëm beméit, fir eis Décisiounsstrukturen ze demokratiséieren.

Ech liesen Iech do zum Beispill aus dem nationale Walprogramm vun der GLEI vun 1989 vir: « Das Referendum muss Entscheidungskraft haben, also bindend, rechtskräftig sein. Das Referendum muss auf Volksinitiative zustande kommen. Es ist nicht vertretbar, dass es in bezug auf die differenzierende Sachentscheidung im Referendum irgendwelche Einschränkungen geben sollte. »

Ech weess elo nët, ob den Här Mehlen séng Iddi an engem grénge Walprogramm ofgeschriwwen huet, mä et huet awer e relativ héijen Unterhaltungswäert, wann den Här Mehlen elo hei probéiert ze maachen, wéi wa séng nei Partei eppes erfond hätt.

Doriwwer eraus gin ech d'Gefill nët lass, dass den « D » am neien Numm vun der Partei besser mam « L » wéi Lëtzebuerger geschriwwen misst gin, wann ech d'Positioun vun Grupp kucken.

Et as zwar schwéier erauszefannen, wéi eng Positioun den Här Mehlen elo grad am Moment anhëlt, op der Fro vum Ausländerwahlrecht zum Beispill. Den ADR huet jo schon déi eng oder aner Kéier séng Meinung geännert, mä Dir sid awer bestëmmt dergéint, Här Mehlen, dass d'Ausländer diirfte beim Referendum matmaachen!

Dofir, Här President, stellen ech dem Här Mehlen hei emol déi prezis Fro, ob den ADR fir oder géint de Prinzip vum Ausländerwahlrecht as, nët nëmmen allgemeng, awer och bei engem Referendum. Ech stelle mer de Moment d'Fro, ob Är Partei, Här Mehlen, den « D » a séngem Numm iwwerhaupt verdénkt huet!

Wann dës Fro mat jo sollt beäntwert gin, da kënnt ech trotzdem dës Proposition de loi nawell nët stëmmen, well se verstéisst, laut méngen Informatiounen, géint d'Verfassung.

Ech sin e bëssche verwonnert driwwer, dass den Här Mehlen, dee bei der Maastricht-Ratifikatioun nët haart genuch konnt jäizen, datt déi Prozedur verfassungswiddreg wir - an dat zu Recht, a mir Gréng hun och déi Meinung vertrauden - elo awer eng verfassungswiddreg Proposition de loi erareecht!

Ier d'Proposition de loi vum ADR, déi e Referendum mat bindendem Charakter virgesäit, - an dat as de sprangende Punkt - kënnt gestëmmt gin, misste fir d'éischt eng ganz Rëtsch Artikelen aus eiser Verfassung geännert gin, an zwar besonnesch déi Artikelen, déi der Châmber als eenzege Corps e « pouvoir législatif » conféréieren.

Ausserdeem as déi Zuel vun 3.000 Leit ze niddreg. Mat esou enger klenger Zuel lafe mer d'Gefor, datt irgendeen poujadistesche Veräin « main basse » mécht op eis Verfassung.

Am Résumé wëll ech dann dem Här Mehlen nach soen: Gitt den Ausländer och d'Recht, fir bei engem bindende Referendum matzemaachen an haalt Iech un déi verfassungsméisseg festgeluegt Prozeduren, da kënne mer nach eng Kéier driwwer schwätzen!

Ech soen Iech merci.

M. le Président.- La parole est maintenant à l'honorable M. Gibéryen.

M. Gast Gibéryen (ADR). Här President, dir Dammen an dir Hären. Zum Schluss vun dëser Diskussioun...

(Interruption)

Entschëllegt, Här Grethen, dann als zweetleschte vun dëser Diskussioun! Ech mengen, dass dat, wat de Kolleg Mehlen hei gesot huet, scho bewirkt huet, dass d'Diskussioun emol un d'Lafe komm as.

Ech géif nach wëllen e puer prinzipiell Saache soen. Et as vu verschiddene Riedner hei an d'Debatt geworf gin, déi Proposition de loi wir verfassungswiddreg. De Kolleg Clesen huet dat elo grad och nach gesot.

Souwuel wéi mir d'Proposition de loi eragereecht hun, wéi och de Mëtteg, wéi de Kolleg Mehlen se präsentiert huet, as gesot gin, wann déi Proposition de loi an där doter Richtung géif akzeptéiert gin, dat géif eng Verfassungsännerung virausetzen. Mir hu jo nët gesot, dass se misst bei der jëtzege Verfassung gestëmmt gin, mä mir hū gesot, wa mer an déi heite Richtung gin, da setzt dat viraus, datt d'Verfassung geännert gët. Et kann een also nët hei permanent soen, et wir e verfassungswiddrege Projet de loi, well dat as vun Ufank un nët vun ons esou gewollt gin. Mir si schlisslech déi heibannen, déi am meeschten drop gehalen hun, datt eis Verfassung soll respektéiert gin, an dat wäerd och an Zukunft esou sin!

Ech wëll kuurz Stellung huelen zu dene verschiddene Spriecher.

Wéi ech dem Här Colling vun der CSV nogelasschert hun, hun ech net esou richtig erausfond, ob hien elo fir e Referendum as oder dergéint. Vü dass hien dat net esou kloer gesot huet, kann een éischter dervun ausgoen, dass d'CSV géint e Referendum as.

Den Här Meintz vun der DP huet eng relativ kloer Sprooch geschwat, datt si am Prinzip fir de Referendum sin, quitte dass ee kann iwwer d'Modalitéiten diskutéieren.

De Kolleg Asselborn vun der LSAP hat hei ferm Problemer mat dem Referendum. Et kënnt een am Fong soen, dass d'Sozialiste ferm Problemer mat der Demokratie hun. Si sin net esou biirgerno, wéi si dat ëmmer wëllen no baussen demonstréieren, well soss misste si jo och dermat d'accord sin, datt d'Biirger zu soziale Froen hei am Land misste gefrot gin.

D'GAP an d'GLEI si fir de Referendum. D'Kollege vun der GAP ware ganz sachlech. Den Här Clesen huet versicht, e bëssche Polemik hei eranzebréngen. Hien huet zum Beispill den Här Mehlen gefrot, ob een den Ausländer och soll d'Walrecht gi fir de Referendum.

Här Clesen, ech géif soen, dass de Referendum eng gutt Méiglechkeet wir, fir d'Lëtzebuerger ze froen, ob ee soll den Ausländer d'Walrecht gin oder net!

Dat soll een emol esou gesinn, firwat een de Referendum kënnt gebrauchen. Als gudden Demokrat misst een éischters emol de Courage hun, virun de Biirger mat esou Froen ze goen, an zwetens dann och déi Décisioun, déi de Wieler hält, ze akzeptéieren, egal no wat fir enger Sait datt et ausget. Dat sin déi demokratesch Spillregelen, déi ee misst hun.

De Malaise virun der Lëtzebuerger Politik kënnt nun emol dohier, datt sech hei am Land iwwer Joerzénge eng gewësse Lobby entwéckelt huet vun e puer Leit, déi d'gutt oder d'schlecht Wieder an der politescher Landschaft an am ganze Land maachen.

Ech mengen, den Traité vu Maastricht war am Fong déi Drëps, déi d'Faass zum Iwwerlaffe bruecht huet, wou ee wiirkelech queesch duerch d'Land gespuert huet, datt d'Leit revoltéiert waren, wéi hei e Parlament en Traité verfassungswiddreg ratifizéiert.

Den Här Asselborn huet gesot, mir géifen net midd gin, fir dat ze soen. Ech mengen, wann ech d'Kollege vun der DP huelen, déi d'Verfassung mat violéiert hun, sou sin déi dach awer zumindest esou fair, datt se dat zouginn. Viru 14 Dag huet nämlech d'Demokratesch Partei an hirem Fraktiounsblättchen, dem « Focus », ganz kloer encadréiert geschriwwen, « rezente Verfassungsverstöße », an do as den Traité vu Maastricht mat opgezielt gin.

Dofir muss ee sech och emol d'Fro stellen, wéi seriö dass de Biirger dëst Parlament, dës Demokratie soll huelen, wann do eng Majoritéit vun Deputéierte kee Problem huet, fir d'Verfassung ze violéieren.

Dofir si mir der Meinung, fir eben deem Frust entgéintzewirken, deen d'Biirger vis-à-vis vun den traditionelle Parteien a vis-à-vis vun der Politik hun, dass een e

Referendum sollt aféieren, fir domat de Biirger wiirkelech d'Méiglechkeet gin, och d'Initiativ ze huelen, fir hei am Land kënne matzeschwätzen, an net de Politiker fir 5 Joer e Blankoscheck auszustellen, déi wuel Walprogrammer virun de Walen opstellen, mä herno am Numm vum Vollek alles décidéieren, och souguer Saachen, déi am Géigesaz zu deem sin, wat se virun de Walen de Leit versprach haten.

M. le Président.- M. Gibéryen, vous avez épuisé votre temps de parole !

M. Gast Gibéryen (ADR).- Dofir, Här President, mengen ech, war d'Iddi vun ons als ADR gutt, fir dës Diskussioun ze lancéieren. Mir hoffen, dass déi Diskussioun weidergeet, an dass virun allem am Kader vun der Verfassungsreform, déi mer nach musse virun den nächste Legislativwale duerschhuelen, dës Iddi mat berücksichtegt gin, fir dass mer dann endlech kënne hei am Land e Schrack a Richtung vu méi Demokratie maachen !

M. le Président.- La parole est maintenant à l'honorable M. Henri Grethen.

M. Henri Grethen (DP).- Här President, mir hun elo 6 Propositions de loi haut de Mëtteg hei diskutéiert. Jiddereng vun dene Propositionen, ob een dofir oder dergéint as, huet de Mérite, dass en Deputéierte sech Gedanke gemaach huet iwwer e Problem, deen e préoccupéiert an déi Fraktiounen, déi hei Stellung geholl hun, hun iwwer déi Propositionen nogeduecht.

All Deputéierten, deen eng Proposition de loi mécht, as och Demandeur, dass déi Proposition de loi weidergeet.

Ech bedauern ët, Här President, an ech gesinn ët als eng ganz grave Mëssuechtung vum Parlament un, dass keen eenzege Regierungsmember de Mëtteg hei war, fir de Parlamentarier nozelauschteren. Et beweist, dass dës Regierung virun der Châmber op alle Fall guer kee Respekt huet. An ech géif lech bieden, Här President, de Protest vun der Châmber der Regierung matzedelen an dem Här Staatsminister ze soen, dass e soll ee vu sänge Regierungsmemberen heihinner delegéieren. Well wann ee kuckt wivill Leit op enger Foto si wann e Grondsteen geluegt gët, wir ët elementar wa weeningstens ee Regierungsmember bei esou Debatten hei an der Châmber wir.

M. le Président.- Mesdames, Messieurs, j'ai l'honneur de vous informer que le Ministre de la Justice a déposé à la Chambre des Députés le projet de loi 3771 sur la mise en état en matière de procédure civile contentieuse et portant introduction et modification de certaines dispositions du Code de procédure civile, ainsi que d'autres dispositions légales.

Acte est donné du dépôt du projet de loi et transmission en sera faite à la commission compétente.

La prochaine séance publique aura lieu le 20 avril 1993. L'ordre du jour vous sera communiqué en temps utile par écrit.

La séance est levée.

(Fin de la séance publique à 18.02 heures)